

REGIONAL NEWS BULLETIN

HEADLINES (EVENING)

1. Village Council kaltlang a inrelbawlina tur 'The Mizoram (Village Councils) Bill 2024' enhona thutkhawm, tum hnihna vawiin khan MINECO ah neih a ni .
2. Mi huaisen chawimawina Sarvottam Jeevan Raksha Padak 2023 chu kum 11 mi Anthony Vanmawia, Tuirial Tlangyeng chhungte hnenah vawiin khan hlan a ni.
3. Prime Minister Narendra Modia chuan vawiin khan Maharastra-a Vadhvan lawngchawlhna dinna tur lungphum a phum.
4. Khawlum lutuk avangin US-a mipui maktaduai 60 chuangte chu inralring tura hriattir an ni.

<><><>

MIZORAM VC BILL

Village Council kaltlang a inrelbawlina tur 'The Mizoram (Village Councils) Bill 2024' enhona thutkhawm, tum hnihna vawiin khan MINECO ah neih a ni a. Local Administration Department Minister Pu C.Lalsawivungan thutkhawm hi a kaihruai a ni.

Pu C.Lalsawivunga chuan thingtlang lam khuate tihhmasawanna tur te, mahni inrelbawl thei tur a thu neihna pek te leh khawtlang tan a hmthatna hrang hrangte chak zawka kalpui a nih theih nan 'The Mizoram (Village Councils) Bill, 2024' chu ruahman a nih thu a sawi a. Khawtlang tihhmawsawn nana inkaihhraina tur a nih dawn avangin uluk tak a zirchian leh sawiho a pawimawh thu sawiin Consultative Committee thutkhawm hmasa thu rel bawhzui a chak tak a hma latu,'Drafting Committee' te inpekna chu lawmawm a tih thu a sawi.

The Mizoram (Village Councils) Bill, 2024-ah hian Village Council din a nih theih dan te, Village Council member bituk zat te, Village Council hruaitu thlan dan te leh inthlanna chuh tur a thil ngai hrang hrangte a awm a. Village Council thuneihna te leh hmasawanna hna thawh kawng a inkaihhraina leh mawhphurhna te a chuang a ni.

He thutkhawmah hian Local Administration Department a thawktute, Drafting Committee member, Political party leh tlawmngai pawl aiawhte he hun ah hian an tel a ni.

<><><>

## TRANSPORT MINISTER

Transport Minister Pu Vanlalhlana'n vawiin khan Hlimena lirthei endikna leh certificate pek chhuah nana ruahman, Inspection & Certification Centre (I&C Centre) sak mek a enfiah a.

Pu Vanlalhlana chuan lirthei endikna leh certificate pawimawhte pekchhuahna tur chu Mizoram tana hmasawna ruhrel pawimawh tak tur a nih thu sawiin, hemi kaihhnawih hna thawktu Company leh a viltu Line Department-te chu theihtawp chhuah turin a chah a. Hna tha leh tlo, ram leh hnam tana chhawrnahawm tak, tha taka puitlin a nih theih nana thahnemngai taka hma la turin a chah a ni.

Hlimen-a Inspection & Certification Centre sak hna hi sawrkar laipui Ministry of Road Transport & Highways (MoRTH), Mizoram sawrkar Transport Department leh Central Institute of Road Transport (CIRT), Pune, Maharashtra te'n thawhhona thuthlung an ziah anga kalpui a ni a. Cheng vaibelchhe 15 leh Nuai 50 senna tur a ni a, senso za zela 90 hi sawrkar laipui tum tur a ni a, a bak za zela 10 chu state sorkarin a tum ve tur a ni.

<><><>

## BRAVERY AWARD

India sorkarin mi huaisen chawimawina a hlan thin zing ami Sarvottam Jeevan Raksha Padak 2023 chu kum 11 mi Anthony Vanmawia, Tuirial Tlangveng chhungte hnenah vawiin khan Aizawl District Bawrhsap Pu Lalhriatpua'n DC Office Conference Hall ah a hlan.

Anthony Vanmawia hi mahni nunna hlana a nau tui tla a chhanchhuah avangin Sarvottam Jeevan Raksha Padak hi hlan a ni a. An unauin nikum April ni 17 khan tlaia an school bang chu khawlum lutuk avangin tuia inchiah dai turin luiah an kal a. Tuirial lui, Pachuau Li-ah a nau Lalhmunsiam chu a chesual a. Anthony Vanmawia hian theihtawp chhuahin a nau hi a chhanchhuak a, vanduaithlak takin a nunna a chan ta a ni.

Aizawl Bawrhsap chuan Anthony Vanmawia thiltih chu ropui a tih thu sawiin chhungkua leh khawtlang tan pawh thil chhuanawm tak a ni, a ti a. Amah awm tawh lo mah se a kalsan tak a chhungte ngaihsak zui zel turin khawtlang hruaitute chu a chah a ni.

Kumin Republic Day puala chawimawina hrang hrang dawng tur an puan zingah Sarvottam Jeevan Raksha Padak Awardee mi 3 an awm a. Anthony Vanmawia bakah hian Mizoram atangin Melody Lalremruati a tel baw a ni.

He Award hian medal leh chawimawina thuziak bakah pawisafai cheng nuai hnih a keng tel a ni.

<><><>

## SAFAI APNA BIMAARI HAGAO

Mamit UD&PA department bultumin vawiin khan Mamit khawpui chhunga Village Council hrang hrangte chuan vengchhung tihfai hnatlang Safai Apna Bimaari hagio – Clean cities Healthy citizens an nei.

Safai Apna Bimaari hagio - Clean cities Healthy citizens hnuai hmalakna hi July ni 1 atanga August ni 31 inkar chhunga neih tur a ruahman niin vawiin khan Mamit khawpui chhungah hman a ni a, he hunah hian veng

chhung hmun hrang hrang - khawlai dung, vantlang hall leh a vel te, vengchhung inkal pawhna te leh vantlang zun In te tihfai a ni.

<><><>

PARTY PR

MNF Party Office Mizo Hnamrun chhung inkhawm vawiina neiha thu sawitu Prof.F.Lalnunmawia, MLA hlui chuan Thangthar te khawvelah ram hruaitu leh party ten thil tha in tihhmuh se, thangthar mithiam leh tha ten politics hi luhna tlaka an ngaihna turin political party te pawhin kalphung dik leh tha zawka kal intihsiak chhoh zel a pawimawh a ti.

Hetiang tur hian MNF party pawh a intuaithar mek tih a sawi a, ZPM sorkar chuan an tum dan leh mipui beisei ang a pha lo chho hle ni a sawiin, ram kaihhruai chu field kotlang atanga duhthu lo sam ang ngawt a ni lo tih an hre chho mek a ni' a ti.

ZPM sorkar chuan thla 8 hmel a hmu ve ta a, an ti ve lo ang an tihte an tih ve leh tho si a, Nasa taka MNF sorkar sum puk sawisel thin khan an han sorkar ve a, a puk uar uarah an tang a; Restricted tender sawisel thin khan restricted tender lem leh Departmental work lem an uar chho hle tih chu mipui ti ti a ni. Chutih laiin Aizawl khawpui chhung kawng chhiat ber hun tawn mek a ni a ti bawk.

Vawiin vek khan Congress Bhavan-ah Congress Party chuan 'Friday Political Session' an hmang a. He hunah hian Pu Rosiamngheta, AMC Corporator chuan thu sawiin, kalphung thar zuartu ten dap chawpin sorkar an kalpui leh si chu a pawitakzet a ni a ti a, a bu nei anga insawi pawhin an lo nei lo a ni a ti a, Phuachawpaw future a awm lo a, indapchawp a, sorkar kal dan tur bu thar neisa insawi ten a bu an zir chawp a ni a ti. An Minister in kuminah zirlai admission ti an tam avangin zirlaibu a indaih lo ni a a sawi chu an enawnaah admission tih tlem tum a lo ni leh hlauh zawk si a ni a ti.

Pu Rosiamngheta chuan sorkar kaltawh ten an sorkar hlimah kawng an siamtha fo tawh tih sawiin chhuanlam neia kawng siam tha lo awm chhun chu ZPM chiah an ni, a ti a, Kristian Principle atanga midang te dam tlanna vei khawp politics khelh a hun tawh tih sawiin, hnam anga dam tlan a ngai a ni a ti.

<><><>

CADC

Chakma Autonomous District Council (CADC)-a Bharatiya Janata Party (BJP) chuan vawiin khan BJP Membership Drive-2024 chungchangah zirhona Kamalanagar-ah an buatsaiha, party worker thahnem tak an tel a ni.

Workshop hi Pu Doyal Chandra Dewan, BJP District Vice Presidentchuan a kaihruaia. Pu Durjya Dhan Chakma chuan Lai, Mara, leh Chakma BJP Coordination Committee-te Delhi an dawrna ah Central Officer-te nen meeting an neih thu sawiin bial hmasawna tur leh hamthatna Mizoram a hnam hnufual ten an dawn theih dan turte an thlen thu a sawi.

Pu Durjya Dhan Chakma chuan CADC chhunga BJP Membership Drive kalpui dan leh a pawimawhna te sawiin, BJP-a inziak lut lian tham tak an awm theih nan party worker zawng zawngte chu mipuite nena thawhona tha tak nei zel turin a chah a ni.

Aizawla BJP Mizoram State Office a inkhawmah MLA Dr K Beichhua chuan thu sawiin, Economic leh Development dinhmunah Mizoram dinhmun a

chhe hle a, 2024-2025 March Budget chu cheng vbc 14412 anih laiin, state leiba erawh 2023 -2024 March ah cheng vbc 12709 a ni. Hei hi 2023 - 2024 RE atanga chhut a ni a, tun dinhmun ah phei chuan engzat tak nge ni ang tih pawh a hriattheih mai lova, Financial Year tawp ah RE ah cheng engzat chiah nge kan bat ahriat theih dawn a ni a ti.

He dinhmun thlir hian rilru a rum tak meuh meuh va, chhanchhuah ngai dinhmunah Mizoram chu a awm mek a, he dinhmun ata chhanchhuak thei tur chu mahni rilru chanpo na zawng zawngte dahtha a, tlawmna nun nen Pu Narendra Modi ngenchhan a ni tih a hriatchian theih a rinawm a ti.

Hlahh tur dik hlau miah silova, hlahh loh tur hlahh leh si te hi a vanduaithlak a, tun hunah chuan Damdawi avanga thalai tamtak thihna, Smuggling te chu hlahh tur ani a, Silai tellova thalai tamtak nunna suat tu anih vangin heng te hi hlahh tur a ni, a ti.

Job Card ringa chhungkaw chawm Mizoram ah mi tam tak an awm a, an dinhmun a hniam viau a hmu an awm thei a, amaherawhchu hetiang chiah hi Central Sorkar laka Mizoram dinhmun a ni mek thung a ni a ti.

<><><>

#### SPORT INDIA CONFERENCE

New Delhi-a Physical Education Foundation of India (PEFI) leh Sport India Foundation bultuma Sport India Conference, 2024 buatsaih chu Sports & Youth Services Minister Pu Lalnghinglova Hmar leh Madhya Pradesh Sports Minister Pu Vishvas Kailash Sarang ten vawiin khan an hmanpui a,

Thu sawiin Mizoram khua zawng zawng hrutchhuak-a sports coaching project lian tham kalpui tum a nih thu leh, sports-a theihna nei tha te zawnchhuahna project pawimawh tak a nih nghal tur thu a sawi. He hunah zawnha chhangin Pu Lalnghinglova Hmar chuan,“Mizoramah Hockey chawinung leh turin hma lak mek a ni a ti a ni.

Kumin a Sport India Conference ah hian sports inrelbawlina dikin ram economy-a hmasawna a thlen theih dan thlirhoin inkhawmpui neih a ni.

<><><>

#### VADHVAN PORT

Prime Minister Narendra Modia chuan vawiin khan Maharashtra-a Vadhvan lawngchawlhna dinna tur lungphum a phum. Vadhvan Port hi Palghar district-a din tur a ni a. He port rual hian fisherises project hrang hrang hawngin Kisan Credit Card a sem bawk a ni. Thusawiin Prime Minister Narendra Modia chuan kum 10 kalta chhungin ramchung tuipui kam lamah hmasawna a kal chak hle a ti a. Sawrkar chuan lawngchawlh hmun port te tunlai milin a ti changtlung a. Tuipui inkalpawhna kawngah hmasawna thlenin sum tam tak heng atan hian a dah a ni a ti bawk. Vawiina Prime Minister hawn tak Vadhvan Port hi cheng vaibelchhe 76000 senga din tur a ni a. Khavel huap pawha lawngchawlhna hmun tha berte zingah siam a ni ang.

<><><>

#### CHAMPAI SOREN JOINED BJP

Jharkhand Chief Minister hlui leh JMM hruai Champai Soren chuan vawiin khan BJP a zawm. Ranchi-a Dhurwa Maidan-ah Champai Soren hi lawmluh a ni a. Thusawiin Pu Soren-a chuan BJP a zawm chhan chu tlangmi

tribal te humhimna leh an dinhmun derthawng chho mek siamtha turin a nih  
thu a sawi a. Santhal Pargana-ah Bangladesh atanga dan kalha lut ru an  
punchak avangin tribalte dinhmun a tha lo hle a ni a ti bawk.

<><><>

## US HEAT

Khawlum lutuk avangin US-a mipui maktaduai 60 chuangte chu  
inralring tura hriattir an ni. US tam laili thlang lam state ah te khua a lum  
chak hle niin US National Weather Service (NWS) chuan a sawi a. Kum danga  
an tawn ngai loh hun rei tak chung khawlum lutuk an tuar mek a. Khawpui  
chung hmun tam takah boruak vawngdai turin hmanrua chi hrang hrang  
chhawp a ni a. US Centres for Disease Control and Prevention chuan kumtin  
US ah khawlum lutuk avangin mi 1220 vel an thi ziah niin a sawi.

<><><>